



Xalq so'zi

O'zbekiston —
kelajagi
buguk
davlat

2024-YIL — YOSHLAR VA BIZNESNI QO'LLAB-QUVVATLASH YILI


1991-yil 1-yanvardan chiqa boshlagan • WWW.XS.UZ • E-mail: Info@xs.uz • 2024-yil 2-aprel, № 66 (8689)

Seshanba Saytimizga o'tish uchun QR-kodni telefoningiz orqali skaner qiling.



O'ZBEKISTON PREZIDENTI XXR DELEGATSIYASINI QABUL QILDI

O'zbekiston Respublikasi Prezidenti Shavkat Mirziyoyev 1-aprel kuni joriy yilning yanvar oyida o'tgan oliy darajadagi uchrashuvdagi kelishuvlar doirasida mamlakatimizga kelgan Xitoy Xalq Respublikasi Davlat kengashi a'zosi, jamoat xavfsizligi vaziri Van Syaouxun boshchiligidagi delegatsiyani qabul qildi.



Yuqori martabali mehmon O'zbekiston yetakchisiga ko'rsatilayotgan mehmondo'stlik uchun chuqur minnatdorlik bildirib, Xitoy Xalq Respublikasi Raisi Si Zinpingning salomi va eng ezgu tilaklarini yetkazdi.

Uchrashuvda xavfsizlikka nisbatan zamonaviy xatar va tahdidlarga qarshi kurashishda amaliy hamkorlikni yanada kengaytirish va birgalikdagi sa'y-harakatlarni muvofiqlashtirish masalalari ko'rib chiqildi.

Davlatimiz rahbari O'zbekiston bilan Xitoy o'rtasidagi do'stlik va barcha sharoitlarda strategik sheriklik munosabatlari bugun yuksak darajaga ko'tarilganini alohida mamnuniyat bilan ta'kidladi. Huquqni muhofaza qilish sohasida samarali idoralararo hamkorlik uchun mavjud salohiyat va imkoniyatlar qayd etildi.

Ustuvor yo'nalishlar sifatida jamoat xavfsizligining asosiy yo'nalishlari bo'yicha tajriba almashish va qo'shma tadbirlar o'tkazish, zamonaviy axborot texnologiyalari va innovatsion usullarni joriy qilish, kiberjinoatchilikka qarshi kurashish, malakali mutaxassislarni tayyorlash va boshqalar ko'rsatib o'tildi.

Mintaqaviy hamkorlik masalalari yuzasidan ham fikr almashildi.

O'ZA.

O'zbekiston Respublikasi Prezidenti Matbuot xizmati surati.

O'zbekiston Respublikasi Oliy Majlisi Senatining ellik birinchi yalpi majlisi to'g'risida

AXBOROT



30-mart kuni Toshkent shahrida O'zbekiston Respublikasi Oliy Majlisi Senatining ellik birinchi yalpi majlisi bo'lib o'tdi.

Unda Senat, hukumat a'zolari, vazirlik va idoralarning vakillari, Senat huzuridagi Yoshlar parlamenti a'zolari hamda ommaviy axborot vositalari xodimlari qatnashdi.

Videokonferensaloqa tarzida o'tkazilgan yalpi majlisi Oliy Majlis Raisi Tanzila Norboyeva olib bordi.

Yalpi majlis Senatning "YouTube" tarmog'idagi sahifasi orqali to'g'ridan-to'g'ri yoritib borildi.

Dastlab senatorlar tomonidan "Telekommunikatsiyalar to'g'risida"gi qonun muhokama qilindi.

Ta'kidlanganidek, yangi tahrirdagi mazkur qonun bilan aholiga va telekommunikatsiya sohasida faoliyat yurituvchi subyektlarga bir qator qulayliklar yaratilmoqda.

Jumladan, bugungi kunda yangi qurilgan ko'p qavatli uylarning ayrimlarida tegishli infratuzilma ko'zda tutilmagani sababli qayta qurilish ishlarini olib borishga to'g'ri kelmog'ida. Ushbu ovoragarchiliklarning oldini olish maqsadida bundan keyin bino va inshootlar qurilishida zamonaviy telekommunikatsiya infratuzilmasi majburiy bo'ladi.

Xususan, ko'p qavatli uylarda yashovchilarning arizasi bo'lganda xizmat ko'rsatuvchi tadbirkorlik subyektlariga binoda mavjud infratuzilmadan beg'araz foydalanish imkoniyati yaratiladi. Operatorlarga telekommunikatsiya infratuzilmasi obyektlaridan birgalikda foydalanishga ruxsat beriladi.

Bundan tashqari, qonun bilan telekommunikatsiya sohasida faoliyat yurituvchi subyektlarga bir qator qulayliklar yaratilmoqda.

Qonunga ko'ra endi bank, to'lov tizimi, to'lov tashkiloti, elektron tijorat

platformasi ilovalari orqali xizmatlarni ko'rsatishda telekommunikatsiyalar sohasida faoliyat yuritish uchun litsenziya talab etilmaydi.

Shuni alohida ta'kidlab o'tish joizki, qonun normalari Konstitutsiyaga moslashtirilib, telekommunikatsiyalar sohasidagi davlat siyosatining asosiy yo'nalishlaridan biri sifatida Internet jahon axborot tarmog'idan foydalanishni ta'minlash uchun shart-sharoitlar yaratish ekanligi belgilab qo'yilmoqda.

Senatorlar ta'kidlaganidek, qonunning qabul qilinishi telekommunikatsiya infratuzilmasidan samarali foydalanish imkoniyatini yaratish orqali xizmatlar qamrovi va sifatini oshirishga xizmat qiladi. Muzokaralardan so'ng qonun ma'qullandi.

Shundan so'ng yalpi majlisda "O'zbekiston Respublikasining ayrim qonun hujjatlariga sud hokimiyatining mustaqilligini kafolatlarini mustahkamlashga, sudlar faoliyati haqida jamoatchilikni xabardor qilishga hamda yagona sud amaliyotini ta'minlashga qaratilgan o'zgartirish va qo'shimchalar kiritish to'g'risida"gi qonun ko'rib chiqildi.

Ma'lumki, keyingi yillarda "Yangi O'zbekiston — yangi sud" prinsipi doirasida aholining odil sudlovga erishish imkoniyatlarini yanada kengaytirish uchun insonning qadr-qimmatini ustuvorligini ta'minlashga qaratilgan muhim islohotlar amalga oshirildi.

Xususan, mamlakatimizda sud-huquq tizimini yanada takomillashtirish, fuqarolar va tadbirkorlarning huquqlari hamda qonuniy manfaatlarini ishonchli himoya qilish choralari kuchaytirish, odil sudlovni samarali ta'minlash bo'yicha izchil ishlar olib borildi.

QISQA SATRLARDA

Toshkentda sanoat ko'rgazmalari o'tkaziladi

Shu yilning 3 — 5-aprel kunlari poytaxtimizdagi "O'zbekpomarkaz" markaziy ko'rgazmalar majmuidagi qator sanoat ko'rgazmalari o'tkaziladi.

"International Expo Group" ko'rgazma kompaniyasi tomonidan tashkil etilayotgan ushbu tadbirlar tog'-kon sanoati, metallga ishlov berish va kimyo sanoati, shuningdek, xavfsizlik, transport va maxsus texnikaga bag'ishlangan xalqaro sanoat forumi bilan boshlanadi. Unda ishtirokchilar o'z imkoniyat, bilim va tajribalari bilan o'rtoqlashadi.

Mazkur birlashgan ekspozitsiyada dunyoning 18 mamlakatidan 171 kompaniya qatnashishi kutilmoqda.

Ilmiy ishlanmalar namoyishi

Samarqand davlat tibbiyot universitetida "Dorivor o'simliklar va ulardan tayyorlangan dori vositalari va biologik faol qo'shimchalar" mavzida tadbir o'tkazildi.

Ko'rgazmali tadbirda Samarqand oliy o'quv yurtlari olimlarining dorivor o'simliklarni yetishtirish hamda qayta ishlash bo'yicha ilmiy ishlanmalari namoyish etildi.

Shuningdek, mamlakatimiz hududida o'rmon xo'jaliklari, fermer xo'jaliklari va shaxsiy tomorqalar tomonidan yetishtirilayotgan dorivor o'simliklar, ularni qayta ishlash natijasida olinayotgan mahsulotlar namoyishi hamda dorivor o'simliklardan xalq salomatligida samarali foydalanish bo'yicha taqdimotlar ham bo'lib o'tdi.

Ekologiya: jamoatchilik nazorati kuchaytiriladi

Poytaxtimizda "Ekologiya sohasida jamoatchilik nazoratining holati va rivojlanish istiqbollari" mavzida davra suhbatlari bo'lib o'tdi.

Demokratik jarayonlarni tahlil qilish markazi tomonidan tashkil etilgan tadbirda ekologiya sohasida jamoatchilik nazoratining roli va ahamiyati, bu borada xorijiy davlatlarning ilg'or tajribalari, ularni O'zbekiston sharoitida joriy etish yuzasidan fikr-mulohazalar bildirildi.

Yakunda mavzu yuzasidan tegishli taklif va tavsiyalar ishlab chiqildi.

"Xalq so'zi".

Qonunchilik palatasi fraksiyalarida

AHOLI HUQUQ VA MANFAATLARINING AMALIY IFODASI

Kecha siyosiy partiyalarning Oliy Majlis Qonunchilik palatasidagi fraksiyalari yig'ilishlari bo'lib o'tdi. Ularda quyi palataning navbatdagi majlisi kun tartibiga kiritilishi rejalashtirilayotgan bir qator qonun loyihalari deputatlar tomonidan atroflicha muhokama qilindi. Asosiy e'tibor qonun loyihalarning ijtimoiy ahamiyatiga egaligi, dolzarbligi, eng muhimi, aholi huquq va manfaatlariga mosligiga qaratildi.

Tadbirkorlik subyektlari uchun yangi imkoniyat va rag'batlar

Tadbirkorlik va ishbilarmonlar harakati — O'zbekiston Liberal-demokratik partiyasi fraksiyasi yig'ilishida davlat mulkini ijaraga berish sohasidagi qonunchilikni buzganlik uchun javobgarlikni kuchaytirish, tadbirkorlik subyektlariga ortiqcha xarajatlar yuklanmasligi va hisobida mablag' tejalishiga qaratilgan muhim qonun loyihalari ko'rib chiqildi.

"O'zbekiston Respublikasi Soliq kodeksining 227¹-moddasiga o'zgartirish kiritish to'g'risida"gi qonun loyihasi qizg'in munozaralarga sabab bo'ldi.

Ta'kidlanganidek, mamlakatimizda tadbirkorlik faoliyatini davlat tomonidan qo'llab-quvvatlash, ishbilarmonlarning huquq va erkinliklarini ta'minlash, ularning erkin va samarali ishlashlari uchun zarur sharoitlar yaratish bo'yicha muayyan ishlar amalga oshirilmoqda. Bunday qulaylik va imkoniyatlar bois yangi subyektlar keskin ko'payib, avvaldan ishlayotganlari faoliyatini kengaytirayotir.

Mazkur qonun loyihasiga ko'ra, Soliq kodeksining 227¹-moddasida belgilangan huquqbuzarliklar uchun qo'llaniladigan moliyaviy sanksiya miqdori realizatsiya amalga oshirilgan oxirgi hisobot choragida olingan sof tushumning 2 foizi va 20 foizi miqdorida belgilanmoqda.

Bunda huquqbuzarlikni bir yil davomida

birinchi marta sodir etganlik uchun realizatsiya amalga oshirilgan oxirgi hisobot choragida olingan sof tushumning 2 foizi, ushbu huquqbuzarlik bir yil davomida takror sodir etilgan holatlarda esa oxirgi hisobot choragida olingan sof tushumning 20 foizi miqdorida belgilash nazarda tutilgan.

Muhokama davomida fraksiya a'zosi Atham Nazirqulov qonun loyihasining zarurati va ahamiyatiga alohida to'xtaldi. Unda nazarda tutilayotgan yangiliklar partiya elektorati bo'lgan tadbirkorlar va ishbilarmonlarni yanada qo'llab-quvvatlash, ularning faoliyatlarini kengaytirish barobarida, yangi ish o'rinlari yaratib, yoshlar bandligini ta'minlashga xizmat qilishini qayd etdi.



2-aprel — Xalqaro bolalar kitobi kuni

KITOBXON AVLOD

EZGULIK VA BUNYODKORLIKKA XIZMAT QILADI

Kitob mutolaasi insonning ma'naviy, badiiy-axloqiy madaniyatini shakllantirish, milliy g'ururi va vatanparvarlik tuyg'usini yuksaltirish, ijodiy mahorati hamda badiiy didining o'sishida muhim o'ringa ega. Shu bois mamlakatimizda kitobxonlikka, yoshlar o'rtasida mutolaa madaniyatini yuksaltirishga, kutubxonay kutubxonachilarni qo'llab-quvvatlashga alohida e'tibor qaratilmoqda.

Prezidentimiz tashabbusi bilan Respublika bolalar kutubxonasi qariyb 150-yillik tarixiy binosining o'ziga xosligi saqlab qolingan holda qayta ta'mirlanib, yana kitobsevarlar uchun ochilgan naqiron avlod kamoloti yo'lidagi muhim qadamlardan biri bo'ldi.

Kutubxona qisqa vaqtda bolalar va o'smirlar hamda ularning ota-

onalari jamlanadigan jozibador maskanga aylanib ulgurd. Mutolaa uchun shinam joylar, barcha yoshdagi insonlarga mos kitoblar, sifatli jihozlangan kompyuter xonalari va tamomila ijodiy muhit — barchasi kitobsevarlar uchun keng imkoniyatlarni yaratadi, desak, mubolag'a emas.

— Kutubxona shunchaki yo'lingiz tushib, zerikkaningizda

bir aylanay deb emas, o'z nurini qalbingizga singdirishga intiq, sahifalari barmoqlaringizni sog'ingan kitoblar bilan to'la, qadamingiz tortib, yuragingiz istab, aqlingiz oshiqib kiriladigan xazinalar makoni, — deydi ziyo maskaniga farzandi bilan kelgan Ma'suma Ismoilova. — Otam umri davomida kitob yiqqan, maktabda o'qituvchi bo'lib ishlagan.



